



Broj/ Број : 02/2-50-1-69-41-9/05
Sarajevo/ Сарајево : 08.11.2005.

Z A P I S N I K

41. sjednice Komisije za vanjsku i trgovinsku politiku Doma naroda Parlamentarne skupštine BiH održane 20.10.2005.

Četrdesteprvu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Vinko Radovanović, Osman Brka, Velimir Jukić, Anto Spajić i Ruža Stojanović, kao i Aida Kreho, pripravnik-volonter.

Osim navedenih, sjednici su, u svojstvu predstavnika predlagača, prisustvovali: Branko Dokić, ministar za komunikacije i promet Bosne i Hercegovine, Zdravko Šavija, savjetnik ministra komunikacija i prometa, Šećerović Rasim i Seid Zorić, Ministarstvo vanjske trgovine i ekonomskih odnosa, Edita Perić, savjetnik ministra vanjske trgovine i ekonomskih odnosa; Emir Hasić, Ministarstvo vanjskih poslova, Tomislav Limov, delegat, te Enes Bećirbašić, zamjenik ministra odbrane BiH.

Od predstavnika međunarodne zajednice, sjednici Komisije su prisustvovali: Jelena Despot i Darija Lebar iz Ureda Visokog predstavnika te Frane Marojević, Delegacija Evropske komisija u BiH.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći:

DNEVNI RED

1. Usvajanje Zapisnika sa 40. sjednice Komisije;
2. Informacija u vezi sa razgovorom obavljenim sa Predsjedavajućim Vijeća ministara, g. Adnanom Terzićem, vezano za Prijedlog zakona o izmjenama i dopunama Zakona o akcizama, Prijedlog zakona o duhanu te Prijedlog Zakona o akcizama na duhanske proizvode (predlagač delegat Tomislav Limov);
3. Prijedlog Zakona o javnom RTV servisu Bosne i Hercegovine - predlagač Vijeće ministara BiH;

4. Saglasnost za ratifikaciju Sporazuma o saradnji u oblasti odbrane između Vijeća ministara Bosne i Hercegovine i Saveta ministara Srbije i Crne Gore - predlagač Predsjedništvo BiH;
5. Saglasnost za ratifikaciju Trgovinskog sporazuma Bosne i Hercegovine i Republike Bjelorusije - predlagač Predsjedništvo BiH;
6. Saglasnost za ratifikaciju Sporazuma između Bosne i Hercegovine i Republike Bjelorusije o unapređenju i zaštiti investicija - predlagač Predsjedništvo BiH;
7. Saglasnost za ratifikaciju Sporazuma o vazdušnom saobraćaju između Vijeća ministara Bosne i Hercegovine i Vlade Republike Grčke - predlagač Predsjedništvo BiH;
8. Saglasnost za ratifikaciju Sporazuma o vazdušnom saobraćaju između Vijeća ministara Bosne i Hercegovine i Vlade Republike Bugarske - predlagač Predsjedništvo BiH;
9. Saglasnost za ratifikaciju Sporazuma između Bosne i Hercegovine i Kraljevine Španije o recipročnom ukidanju viza za nosioce diplomatskih i službenih pasoša - predlagač Predsjedništvo BiH;
10. Tekuća pitanja.

Dnevni red je jednoglasno usvojen.

Ad. 1. Usvajanje Zapisnika sa 40. sjednice Komisije

Zapisnik sa 40. sjednice Komisije jednoglasno je usvojen.

Ad. 2. Informacija u vezi sa razgovorom obavljenim sa Predsjedavajućim Vijeća ministara, g. Adnanom Terzićem, vezano za Prijedlog zakona o izmjenama i dopunama Zakona o akcizama, Prijedlog zakona o duhanu te Prijedlog Zakona o akcizama na duhanske proizvode (predlagač delegat Tomoslav Limov);

G. Čengiđ je članovima Komisije prezentirao informaciju vezanu za razgovor sa predsjedavajućim Vijeća ministara, g. Adnanom Terzićem, koji je održan 21. septembra 2005. godine. Sastanku su, osim gospode Čengiđ i Terzića, prisustvovali g. Velimir Jukić, predsjedavajući Doma naroda i član Komisije, g. Dragan Doko, ministar vanjske trgovine i ekonomskih odnosa i g.đa Ljerka Marić, ministar finansija i trezora. Tom prilikom, predstavnici Komisije su iznijeli predsjedavajućem Vijeća ministara svoje razumijevanje da Vlada Republike Srpske osporava ustavni osnov za donošenje Zakona o duhanu na državnom nivou. G. Terzić je odmah razgovarao sa ministricom Svjetlanom Cenić, te je, odmah po završetku razgovora, obavijestio članove Komisije da je ministrica Cenić izjavila da Vlada ne osporava ustavni osnov, nego da postoje određena tehnička pitanja koja treba raspraviti prije konačnog uobličavanja teksta Prijedloga zakona o duhanu. G. Terzić je obećao da će Prijedlog zakona o duhanu Vijeće ministara uputiti u parlamentarnu proceduru u roku od 60 dana.

Što se tiče Zakona o akcizama na duhanske proizvode, te Prijedloga zakona o izmjenama i dopunama Zakona o akcizama, g. Terzić je istakao da Vijeće ministara smatra da pitanje akciza na

duhanske proizvode treba riješiti kroz zakon o izmjenama i dopunama Zakona o akcizama, a ne kroz poseban zakon. Iz tog razloga, obećao je da će ova pitanja biti uključena u Zakon o izmjenama i dopunama zakona o akcizama, koji će biti upućen u parlamentarnu proceduru u roku od 60 dana.

Gospodin Tomislav Limov je izrazio svoje zadovoljstvo i zahvalnost članovima Komisije, te izjavio kako se nada optimalnom rješenju ovog problema.

Informaciju u vezi sa razgovorom obavljenim sa predsjedavajućim Vijeća ministara, članovi Komisije jednoglasno su usvojili.

Ad. 3 Prijedlog Zakona o javnom RTV servisu Bosne i Hercegovine - predlagač Vijeće ministara BiH;

Predsjedavajući Komisije je dao kratki pregled dosada urađenog vezano za Zakon o javnom RTV servisu BiH. Podsjetio je sve prisutne i članove Komisije kako je Prijedlog zakona razmatran još u julu mjesecu 2004. godine na 22. sjednici Komisije za vanjsku i trgovinsku politiku, kada su usvojeni određeni amandmani i kada je Zakon prošao Komisiju, ali s obzirom da je Zakon o javnom RTV sistemu, za koji je ovaj Zakon usko vezan, razmatran u dvije verzije i tek je druga usvojena, Kolegij je odlučio da se komisijska faza za Zakon o javnom RTV servisu, produži. S obzirom da je Zakon o javnom RTV sistemu BiH usvojen od strane Parlamentarne skupštine BiH, dana 05.10.2005. godine, stekli su se uvjeti da se razmatra Zakon o javnom RTV servisu. Također, podsjetio je da određen rok za ulaganje amandmana (15 dana). Predsjedavajući je upoznao sve prisutne da su svoje amandmane obnovili g. Velimir Jukić i Anto Spajić (ispred Kluba hrvatskih delegata), te g. Halid Genjac.

Zatim se prešlo na raspravu o amandmanima, kako slijedi:

AMANDMAN I – Velimir Jukić, Anto Spajić

U članku 9. iza točke (1) dodaje se nova točka (2) koja glasi:

«(2) Programi BHRT bit će prilagođeni potrebama pojedinih konstitutivnih naroda u Bosni i hercegovini, i bit će uređivani i emitirani na tri službena jezika (bosanskom, hrvatskom i srpskom) odvojeno na tri različita kanala.»

Dosadašnja točka (2) postaje točka (3), a točka (3) postaje točka (4).

Amandman nije dobio potrebnu većinu (dva glasa za, dva glasa protiv, te dva suzdržana glasa).

AMANDMAN I – Halid Genjac

U članu 19. Prijedloga zakona u stavu (2) na početku teksta riječi «BHRT i» brišu se. Ostatak teksta ostaje nepromjenjen.

U članu 19. dodaje se novi stav (3) koji glasi:» BHRT ne može stjecati novu imovinu, uključivo tehničke resurse, transport, tehničku infrastrukturu, zgrade i zemljište, niti sklapanjem ugovora niti donacijama».

Amandman nije dobio potrebnu većinu (dva glasa za, četiri glasa protiv).

Nakon glasanja o amandmanima, članovi Komisije glasali su o tekstu Prijedloga Zakona o javnom RTV servisu BiH, zajedno sa amandmanima koji su usvojeni na 22. sjednici Komisije.

Članovi Komisije su većinom glasova (četiri glasa za, dva glasa protiv), podržali tekst Prijedloga zakona o Javnom RTV servisu BiH.

Ad. 4 Saglasnost za ratifikaciju Sporazuma o saradnji u oblasti odbrane između Vijeća ministara Bosne i Hercegovine i Saveta ministara Srbije i Crne Gore - predlagač Predsjedništvo BiH;

U svojstvu predstavnika predlagača, o Sporazumu je govorio g. Enes Bećirbašić, zamjenik ministra odbrane BiH. Konstatirano je da je Sporazum potpisan u februaru 2005. godine, te predočio članovima Komisije sve prednosti zaključenja ovog sporazuma.

Članovi Komisije su, većinom glasova (pet za, jedan suzdržan), odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 5. Saglasnost za ratifikaciju Trgovinskog sporazuma Bosne i Hercegovine i Republike Bjelorusije - predlagač Predsjedništvo BiH;

O sadržaju i svim prednostima zaključenja ovog Sporazuma, od strane predlagača, govorio je g. Emir Hasić. Ovom prilikom, g. Hasić je rekao kako se radi o tipskom Sporazumu, dakle, Sporazumu sličnom onima koje je Bosna i Hercegovina ranije zaključila sa drugim zemljama. Također, naglašeno je da Sporazum zadovoljava sve principe Svjetske trgovinske organizacije, te predložio članovima Komisije da podrže ratifikaciju.

Članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 6. Saglasnost za ratifikaciju Sporazuma između Bosne i Hercegovine i Republike Bjelorusije o unapređenju i zaštiti investicija - predlagač Predsjedništvo BiH

U svojstvu predstavnika predlagača, o Sporazumu je govorio g. Hasić. Upoznao je članove Komisije da se radi o tipskom Sporazumu, zahvaljujući kojem će Bosna i Hercegovina povećati bilateralnu saradnju na ekonomskom planu sa Republikom Bjelorusijom i omogućiti prodor stranog kapitala.

Članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 7. Saglasnost za ratifikaciju Sporazuma o vazdušnom saobraćaju između Vijeća ministara Bosne i Hercegovine i Vlade Republike Grčke - predlagač Predsjedništvo BiH;

O Sporazumu je govorio g. Hasić. Istakao je da je Sporazum potpisan 2004. godine, te da se radi o tipskom sporazumu i zamolio članove Komisije da podrže zaključenje i ovog Sporazuma.

Nakon izlaganja od strane predlagača, Predsjedavajući Komisije je iznio svoje zapažanje vezano za ovaj Sporazum, a koje se odnosi na anex – raspored ruta. Naime, upozorio je na sadržaj tog anexa: »avio prevoznici iz BiH mogu letiti isključivo u Atinu kao jedinu destinaciju na teritoriji Grčke, dok avio prevoznici iz Grčke mogu letiti na sve destinacije u Bosni i Hercegovini«, što drugim riječima znači, da nije ispoštovan princip reciprociteta između zemalja ugovornica.

Komisija je, potom, donijela sljedeći zaključak: »Izjašnjavanje o Sporazumu se odlaže do daljnjeg, zbog činjenice da je u anexu Sporazuma sa Grčkom predviđena mogućnost da avio prevoznici iz BiH mogu letiti isključivo u Atinu kao jedinu destinaciju na teritoriji Grčke. Kako je, s druge strane, predviđeno da avio prevoznici iz Grčke mogu letiti na sve destinacije u Bosni i Hercegovini, to znači da se pri zaljučenju Sporazuma nije vodilo računa o reciprocitetu ugovornih strana. Zbog toga, Komisija je odlučila da traži dodatna objašnjenja od Vijeća ministara BiH koje je učestvovalo u pregovorima, kako bi se osigurala recipročnost prava između Bosne i Hercegovine i Grčka u pitanju zračnog saobraćaja koje tretira ovaj Sporazum.

Zaključak je jednoglasno usvojen.

Ad. 8. Saglasnost za ratifikaciju Sporazuma o vazdušnom saobraćaju između Vijeća ministara Bosne i Hercegovine i Vlade Republike Bugarske - predlagač Predsjedništvo BiH;

Predstavnik predlagača, g. Hasić, naveo je da je Sporazum potpisan 2004. godine, a ratifikacija se predlaže u cilju obavljanja vazdušnog saobraćaja između teritorija dviju država.

Obostrano je zaključeno da se radi o tipskom sporazumu, te da su ispoštovani svi osnovni principi.

Članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 9. Saglasnost za ratifikaciju Sporazuma između Bosne i Hercegovine i Kraljevine Španije o recipročnom ukidanju viza za nosioce diplomatskih i službenih pasoša - predlagač Predsjedništvo BiH;

O Sporazumu je govorio g. Hasić. Istakao je kako se radi o Sporazumu koji je izuzetno povoljan za Bosnu i Hercegovinu, jer je ukidanje viza za nosioce diplomatskih i službenih pasoša, prvi korak ka ublažavanju viznog režima za sve građane Bosne i Hercegovine.

U skladu sa navedenim, članovi Komisije odlučili su zaključkom zatražiti od Vijeća ministara da odredi prioritete i ubrza pregovore u vezi sa ukidanjem viza za nosioce diplomatskih i službenih pasoša sa zemljama potpisnicama Schengena, drugim evropskim zemljama, te ostalim zemljama u svijetu, kao korak za ublažavanje viznog režima za građane Bosne i Hercegovine od strane ovih zemalja.

Potom, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 10. Tekuća pitanja

1. Predsjedavajući je informirao članove Komisije o Zahtjevu za prijem novoimenovanih ambasadora Bosne i Hercegovine i generalnog konzula, dana 07.11.2005.godine, od strane članova Komisije za vanjsku i trgovinsku politiku. Članovi Komisije su odlučili da se prijem ambasadora i obavi 07.11.2005. godine, u 12:00 sati.
2. Pod ovom tačkom dnevnog reda, također, razmatralo se i postavljeno pitanje grijanja, koje u prostorijama Parlamentarne skupštine još nije počelo, iako su uvjeti potrebni za to, ispunjeni. Iz tog razloga, Komisija za vanjsku i trgovinsku politiku Doma naroda Parlamentarne skupštine Bosne i Hercegovine odlučila je uputiti dopis u kojem se traži od Kolegija Doma naroda da riješi pitanje grijanja i utvrdi odgovornost zbog toga što zgrada Parlamentarne skupštine ni do dana 20.10.2005. godine nema grijanja, što otežava rad svim zaposlenima i rad Komisije, koja je tog dana održavala svoju 41. sjednicu.

Predsjedavajući Komisije
Hasan Čengić